

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N j E
po Prijavi namjere koncentracije privrednog subjekta Telekom Slovenije d.d. Republika Slovenija i privrednog subjekta Blic.Net d.o.o. Bosna i Hercegovina

Januar, 2008. godine



Broj: 01-02-26-039-3-II/07
Sarajevo: 30.01.2008. godine

Na osnovu člana 25. stav (1) tačka e) člana 42. stav (1) tačka d) člana 43. stav (2), a u vezi sa čl. 12., 14., 16. i 18. Zakona o konkurenciji ("Službeni glasnik BiH", broj 48/05 i 76/07), rješavajući po Prijavi namjere koncentracije privrednih subjekata Telekom Slovenije d.d., Cigaletova 15, Ljubljana, Republika Slovenija i Blic.Net d.o.o., Jevrejska bb, lamela 3/II, Banja Luka, zaprimljene pod brojem: 01-02-26-039-II/07 dana 08.11.2007. godine, Konkurencijsko vijeće na 59. sjednici održanoj dana 30.01.2008. godine je donijelo

R J E Š E N J E

1. Ocjenjuje se dopuštenom koncentracija koja je nastala na tržištu pružanja internet usluga u Republici Srpskoj, sticanjem kontrole kupovinom većine udjela u osnovnom kapitalu, kojim je privredni subjekt Telekom Slovenije d.d., Cigaletova 15, Ljubljana, Republika Slovenija postao 100% vlasnik privrednog subjekta Blic.Net d.o.o., Jevrejska bb, lamela 3/II, Banja Luka.
2. Zbog nepodnošenja Prijave namjere koncentracije u zakonom predviđenom roku, izriče se novčana kazna privrednom subjektu Telekom Slovenije d.d. u visini od 200.000,00 (dvijestotinehiljada) KM, koju je dužan platiti u roku od 8 dana od prijema ovog Rješenja.
3. Ovo Rješenje je konačno i upisuje se u Registar koncentracija.
4. Ovo Rješenje bit će objavljeno u "Službenom glasniku BiH", službenim glasilima entiteta i Brčko Distrikta Bosne i Hercegovine.

O b r a z l o ž e n j e

Privredni subjekt Telekom Slovenije, Cigaletova 15, Ljubljana, Republika Slovenija (u daljem tekstu: Telekom Slovenije ili podnosilac Prijave), putem ovlaštenog advokata Seada Miljkovića, Fra Anđela Zvizdovića 1, Sarajevo, je podnio Konkurencijskom vijeću Prijavu namjere koncentracije (u daljem tekstu: Prijava), kojom podnosilac Prijave želi kupovinom većine udjela u osnovnom kapitalu steći 100% vlasništvo nad privrednim subjektom *Blic.Net d.o.o.*, Jevrejska bb, lamela 3/II, Banja Luka (u daljem tekstu: *Blic.Net*).

Prijava predmetne koncentracije podnesena je Konkurencijskom vijeću dana 08.11.2007. godine i ista nije podnesena u zakonskom roku, od osam dana od dana zaključenja Ugovora o kupovini poslovnog udjela u *Blic.Net d.o.o.* (u daljem tekstu: Ugovor), u smislu člana 16. stav (1) Zakona o konkurenciji. Naime Ugovor o kupovni poslovnog udjela zaključen je dana 20.12.2006. godine.

Uvidom u dostavljenu Prijavu, Konkurencijsko vijeće je utvrdilo da je ista kompletna, i izdalo je Potvrdu o prijemu kompletne i uredne Prijave, dana 17.12.2007. godine, pod brojem: 01-02-26-039-1-II/07, u skladu sa članom 30. stav (3) Zakona.

Podnosilac Prijave namjere koncentracije nema obavezu podnijeti Prijavu za ocjenu koncentracije, ni jednom drugom tijelu ovlaštenom za ocjenu koncentracije, izvan teritorije Bosne i Hercegovine

Analizom podataka navedenih u Prijavi, Konkurencijsko vijeće je utvrdilo da su učesnici predmetne koncentracije po završnom računu u 2005. godini, kao finansijskoj godini, koja je prethodila koncentraciji ostvarili sljedeći ukupni prihod, i isti je naveden u Tabeli 1. :

Tabela 1.

Ukupan prihod (u KM)	Telekom Slovenija	<i>Blic.Net</i>
Svjetski prihod	(..)** ¹	-
BiH	-	(..)**

Na osnovu podataka o ukupnom ostvarenom prihodu učesnika predmetne koncentracije utvrđeno je postojanje obaveze Prijave namjere koncentracije, obzirom da su ispunjeni kriterijumi ukupnog ostvarenog prihoda privrednih subjekata, učesnika predmetne koncentracije na tržištu roba i/ili usluga na svjetskom tržištu, u godini koja je prethodila predmetnoj koncentraciji, u smislu člana 14. Zakona o konkurenciji.

U postupku ocjene Prijave namjere koncentracije utvrđene su sljedeće činjenice:

1. Pravni osnov i oblik koncentracije

Pravni osnov predmetne koncentracije predstavlja Ugovor o kupovini poslovnog udjela u Blic.Net d.o.o. (u daljem tekstu: Ugovor), zaključen dana 20. decembra 2006. godine u Ljubljani, između privrednog subjekta Telekom Slovenija (kao kupca) i privrednog subjekta Sinfonika društvo za elektronske komunikacije d.d. (kao prodavca), Motnica 7, 1236 Trzin, Republika Slovenija.

Predmetnim Ugovorom privredni subjekt Telekom Slovenija stiče 100% udjela u osnovnom kapitalu privrednog subjekta Blic.Net d.o.o., koji je u vlasništvu privrednog subjekta Sinfonika d. d., Motnica 7, 1236 Trzin, Republika Slovenija.

Pravni oblik predmetne koncentracije je sticanje kontrole ili dominantnog uticaja jednog privrednog subjekata nad drugim privrednim subjektom i to sticanjem kupovinom većine dionica ili udjela osnovnog kapitala, u skladu sa članom 12.stav (1) tačke b) pod 1) Zakona.

2. Učesnici koncentracije

Učesnici predmetne koncentracije su privredni subjekt Telekom Slovenije, Cigaletova 15, Ljubljana, Republika Slovenija i privredni subjekt Blic.Net d.o.o., Jevrejska bb, lamela 3/II, Banja Luka.

2.1. Privredni subjekt Telekom Slovenije d.d.

Privredni subjekt Telekom Slovenije, Cigaletova 15, Ljubljana, Republika Slovenija je dioničko društvo organizovano u skladu sa zakonima Republike Slovenije i registrovan je kod Okružnog suda u Ljubljani, pod matičnim brojem 5014018, dana 01.10.1993.godine.

Osnovna djelatnost privrednog subjekta Telekom Slovenije je pružanje usluga iz oblasti telekomunikacija, koje obuhvataju sljedeće usluge: usluge fiksne i mobilne telefonije, internet usluge, obradu podataka i distribuciju kablovskog TV signala.

¹ (..)** - Podaci predstavljaju poslovnu tajnu

U Republici Sloveniji privredni subjekt Telekom Slovenije ima u (..)**% vlasništvu sljedeće privredne subjekte: "Mobitel" d.d., "SiOL" d.o.o., "GVO" d.o.o., "Avntenta" d.o.o., "Soline" d.o.o. i "Planet 9" d.o.o. U 2006. godini privredni subjekt Telekom Slovenije osnovao je privredni subjekt "Tele- dat" d.o.o.

U toku 2006. godine privredni subjekt Telekom Slovenije stekao je većinsko vlasništvo nad privrednim subjektima: "Ipko net"- Kosovo ((..)**%) i "On net" d.o.o. Makedonija ((..)**%) .

Na dan 31.12.2006. godine Republika Slovenija imala je u vlasništvu (..)** dionica ili 62,5268 % privrednog subjekta Telekom Slovenije.

Privredni subjekt Telekom Slovenije prije provođenja predmetne koncentracije nije imao subsidijarnih društava na tržištu Republike Srpske.

2.2.Privredni subjekt Blic.Net

Privredni subjekt Blic.Net d.o.o., Jevrejska bb, lamela 3/II, Banja Luka, organizovan je u skladu sa zakonima Republike Srpske i Bosne i Hercegovine, registrovan je kod Osnovnog suda u Banja Luci pod matičnim brojem 1-2982-00, dana 31.03.2003. godine.

Osnovna djelatnost privrednog subjekta Blic.Net je pružanje internet usluga.

Vlasnik (..)**% udjela osnovnog kapitala privrednog subjekta Blic.Net prije provođenja predmetne koncentracije bio je privredni subjekt Sinfonika društvo za elektronske komunikacije d.d. Motnica 7, 1236 Tržin, Republika Slovenija, registrovan u Okružnom sudu u Ljubljani pod brojem 5931908, dana 15.01.1996.godine (u daljem tekstu: Sinfonika).

Pored privrednog subjekta Blic.Net , privredni subjekt Sinfonika u Bosni i Hercegovini ima registrovano subsidijarno društvo "Sinfonika" društvo za elektronske komunikacije d.o.o. Sarajevo, Zmaja od Bosne 4, Holiday Inn-1008, registrovano kod Kantonalnog suda u Sarajevu pod matičnim registarskim brojem 1-25085, dana 22.03.2005. godine (u daljem tekstu : Sinfonika Sarajevo).

3. Analiza relevantnog tržišta

Članom 3. Zakona i čl. 4., 5. i 6. Odluke o utvrđivanju relevantnog tržišta ("Službeni glasnik BiH", broj 18/06) određeno je relevantno tržište određenih proizvoda ili usluga koje su predmet djelovanja privrednih subjekata na relevantnom geografskom tržištu.

Konkurencijsko vijeće je utvrdilo, da je relevantno tržište proizvoda, učesnika predmetne koncentracije pružanje internet usluga.

Relevantno geografsko tržište za ovu koncentraciju je Republika Srpska, jer se pružanje intrnet usluga, obavlja samo na teritoriji Republike Srpske.

Slijedom navedenog, Konkurencijsko vijeće je kao relevantno tržište za predmetnu koncentraciju utvrdilo tržište pružanja internet usluga na teritoriji Republike Srpske.

Prema zvaničnim podacima Telekoma Slovenije objavljenim na Web stranici, u Republici Srpskoj Blic.Net ima tržišni udio 21%, dok Teol ima 52%, Spinter 12%, Zone 7% i ostali 8% među kojima je i Aneks d.o.o. koji je poslije ove koncentracije pripojen u vlasništvo također Telekoma Slovenije.

4. Procjena predmetne koncentracije

Konkurencijsko vijeće je na osnovu procjene i analize strukture relevantnog tržišta, tržišnih udjela učesnika koncentracije ocijenilo da u momentu provođenja namjeravane koncentracije nije došlo do promjene tržišnih udjela, učesnika predmetne koncentracije, odnosno provođenje predmetne koncentracije neće dovesti do stvaranja niti jačanja dominantnog položaja učesnika predmetne koncentracije, obzirom da privredni subjekt Telekom Slovenije do ove koncentracije nije djelovao, odnosno nema tržišnih udjela na relevantnom tržištu Republike Srpske u oblasti pružanja internet usluga, te da tržišni udio privrednog subjekta Blic.Net ostaje nepromjenjen. U ovom slučaju došlo je samo do promjene kontrole nad postojećim učesnikom predmetne koncentracije.

Konkurencijsko vijeće je ocjenjujući dopuštenom predmetnu koncentraciju imalo u vidu i činjenicu da je poslije nastanka ove koncentracije, Telekom Slovenija izvršio koncentraciju privrednog subjekta Aneks d.o.o. Banja Luka, koja je odobrena od strane Konkurencijskog vijeća, i da je konstatovano da je došlo do promjene tržišnog udjela na relevantnom tržištu u oblasti pružanja internet i telefonskih usluga, ali da ta koncentracija nije dovela do stvaranja i jačanja dominantnog položaja u ovoj oblasti.

Uzimajući u obzir sve iznesene činjenice i podatke koji su prethodili donošenju odluke, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) tačka a) Zakona, kao što je odlučeno u dispozitivu ovog Rješenja.

5. Novčana kazna

Konkurencijsko vijeće je ocijenilo da predmetna koncentracija predstavlja koncentraciju u smislu člana 12. stav (1) tačka b) pod 1) Zakona, te je podnosilac Prijave, bio dužan u vremenskom roku od osam dana od dana zaključivanja predmetnog Ugovora dostaviti Prijavu, u skladu sa članom 16. stav (1) Zakona.

Imajući posebno u vidu navedene odredbe Zakona i nakon uvida u dostavljenu dokumentaciju Konkurencijsko vijeće je utvrdilo postojanje povrede člana 16. stav (1) Zakona od strane podnosioca Prijave, jer je isti Prijavu namjere koncentracije podnio sa zakašnjenjem od 10 mjeseci i 11 dana.

Konkurencijsko vijeće, u smislu člana 49. stav (1) tačka b) Zakona može izreći novčanu kaznu do 1% od ukupnog prihoda iz prethodne godine poslovanja podnosiocu Prijave, za kršenje odredbi člana 16. stav (1) Zakona.

Konkurencijsko vijeće je izreklo novčanu kaznu privrednom subjektu Telekom Slovenije u iznosu od 200.000,00 KM, što predstavlja (...)***% ukupnog ostvarenog godišnjeg prihoda u 2005. godini.

Pri izricanju visine novčane kazne Konkurencijsko vijeće je imalo u vidu činjenicu da je podnosilac prijave sa zakašnjenjem prijavio predmetnu koncentraciju, te da podnosilac Prijave potiče iz zemlje koja je članica EU i gdje je razvijeno i poznato zakonodavstvo u oblasti tržišne konkurencije, te da je morao znati za obavezu podnošenja namjere prijave koncentracije. Izricanje novčane kazne ima prvenstveno cilj da upozori učesnike koncentracije da moraju poštovati u potpunosti propise koji regulišu ovu oblast, ne samo kažnjavanje prekršioca zakona, radi čega je izrečena naprijed navedena kazna.

6. Administrativna taksa

Na ovo Rješenje Podnosilac prijave u skladu sa Odlukom o administrativnim taksama u vezi sa procesnim radnjama pred Konkurencijskim vijećem ("Službeni glasnik BiH", broj 30/06) i u skladu sa članom 2. Tarifni broj 107 stav (1) tačka d) pod 1) obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

7. Pouka o pravnom lijeku

Protiv ovog Rješenja nije dozvoljena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

Predsjednik

Sanja Božić